

四庫全書

子部

欽定四庫全書

六藝之一錄卷一百十五

錢唐倪濤撰

石刻文字九十一

顧南原碑考

陳仲弓殘碑 中平三年 金石錄與隸續俱不言碑
之所在按蔡邕集載此碑云勒表墳墓則碑當在墓
前一統志云陳實墓在郾城縣西三十里 額題云
漢文範先生陳仲弓之碑十篆字金石錄云碑文已

漫滅蔡邕字畫見於今者絕少故雖滅漫之餘尤為可惜以校集本不同者已數字惜其不完也蔡邕集仲弓三碑皆邕撰其一碑云中平三年秋八月丙子卒三碑皆云春秋八十有三後漢書仲弓傳以為中平四年年八十四卒於家者疑傳誤字原云碑之立當在中平三年

陳仲弓殘碑陰 金石錄云故吏姓名多已剝缺蔡邕小字八分惟此與石經遺字爾石經字畫謹嚴而此

碑尤放逸可愛

陳實壇碑

中平三年

隸釋云在亳州永城縣即古

之太丘也永城今屬河南歸德府額題云故太丘

長潁陳君壇八篆字隸釋云潁之下闕二字陳實本

傳云潁川許人此額所闕者潁之下是川又一字當

是許也額之題郡邑猶劉曜東平無鹽之比其云壇

者蓋指廟中之壇段光為孫叔敖立廟作碑其文云

興祀立壇是也蔡中郎作陳君三碑其第一碑云許

令以下至於國人立廟舊邑四時烝嘗歡哀承祀如其祖禰所謂立廟舊邑則知太丘有此碑其文皆已亡缺無可讀者惟其首云君諱實字仲躬諸書皆字陳君曰仲弓獨此碑不同殆是借用金石錄云蔡邕集有陳仲弓三碑以集本校之此碑非蔡邕撰者然字畫亦奇偉惜其殘缺不完也

陳度碑 中平四年 未詳所在 隸續云此刻大半
索碑所存近二百字少成句讀其中並無官稱僅有

相國及督郵字繼有皆以疾辭之句其前有散放及
姻婭字稱其仁者再三銘詩有貨殖屢中之句似是
家有餘財仁周隣曲相遣督郵招聘稱疾未嘗諾仕
者君諱度字妙高陳國柘人郡國志陳國有柘縣趙
氏認柘作相誤也

劉衡碑 中平四年 金石錄云衡墓與碑在今齊州
歷城縣界中古平陵城傍余嘗親至墓下觀此碑因
模得之墓前有石獸制作甚工 無額碑云遷蜀國

都尉不行拜趙相金石錄與隸釋俱作趙相劉衡碑
譙敏碑 中平四年 隸釋云在冀州東觀餘論云在
棗強縣北十七里冀州棗強今俱屬真定府 額題
云漢故小黃門譙君之碑九篆字集古錄云其文不
甚磨滅隸釋云予所得者惟三字不能辨東觀餘論
云近世有信安何籀者以隸書知名目是碑為蔡中
郎書未知何據自謂學此法清勁有古意與梁孟皇
行筆正相反予謂漢世隸法至魏大變不必梁蔡勢

自爾也此碑意象古雅借非中郎自可師法

張納功德叙 中平五年 隸釋云在巴州輿地碑目

云在重慶府府學中 無額碑首行題云巴郡太守

都亭侯張府君功德叙碑式云有穿題一行文十七

行行四十八字隸釋云此碑乃掾屬李元等為之碑

陰各書曹掾之職而不稱故吏則是張君在郡之時

所立

張納碑陰 碑式云有穿兩旁有暈前兩行題李元然

存二人後十五行行五人張榮一人名氏字多侵及
下列末一行書歲月及祝頌之語隸釋云題名七
十有四人從事及丞則書其字主簿以下掾吏並書
名蓋一郡之吏也

陳實殘碑 中平五年 金石錄云在潁川陳太丘墓
側額題云漢故司空掾陳君碑八篆字金石錄云
碑已殘缺不可辨惟其首八大字尚完字畫奇偉隸
續云此蔡中郎所作第三碑也其文乃豫牧褒讚悲

傷之辭僅有前七十字下文盡皆不存中郎作太丘
第一碑云中平三年卒此碑作五年者豫牧立碑之
年也史傳雜書蔡集皆作仲弓惟太丘壇碑作仲躬
此碑彷彿亦然趙氏引世說注太丘次子諡嘗以司
空掾召謂此是陳諶之碑殊不知碑中自有太丘姓
名其文又在蔡邕集蓋不能認碑故有斯誤按後漢
書陳實傳云大將軍竇武辟以為掾屬而不言為司
空掾據此碑額題疑是史傳失載金石錄謂是諶碑

非也陳實傳又云有六子紀諶最賢父子並著高名
時號三君每宰府辟召常同時旌命羔雁成羣恐其
父子皆嘗以司空掾召也蔡邕集載此碑作陳太丘
廟碑銘其文有云大將軍賜諡羣后建碑國人立廟
先生有二子季方盛年早亡亦圖容加諡元方在喪
毀瘁消形嘔血純孝過哀率禮不越于時嘉異畫像
郡國所云季方者諶也元方者紀也紀亦畫像於廟
存沒並列不亦異哉

圉令趙君碑 初平元年 字原云在鄧州一統志云

在南陽府舊文宣王廟內南陽縣宋屬鄧州今俱屬
河南南陽府 額題云漢故圉令趙君之碑八篆字
為二行碑圖云暈三重惟內一重自右達於左漢碑
圭首多若是惟中穿相去有遠近不同者文十三行
行十九字末行空八字書年月與下一字齊金石錄
云碑已訛缺名字皆不可考予家有舊拓本得之寒
山趙氏此隸釋所載斯詠上多其蓋二字

周公禮殿記

初平五年

輿地碑目云成都府學

集古錄目云文翁為蜀郡守始立學校安帝永初中以火災被焚獻帝時太守高暉重修立之金石錄云今成都府學有漢時所建屋柱皆正方上狹下濶此記在柱上刻之初平五年立距今蓋千年矣而字畫完好可讀當時石刻在者往往磨滅此記刻於屋楹乃與金石爭壽亦異矣隸釋云周公禮殿規模古質井斗異制此記刻於東南之一柱亦木爾歐陽氏以

為文翁石柱記者誤也碑式云周公禮殿記六行行
三十八字集古錄云顏有意益州學館廟堂記謂獻
帝無初平五年當是興平元年蓋時天下喪亂西蜀
僻遠年號不通故仍稱舊號也今檢范曄漢書本紀
初平五年五月改為興平顏說是也隸續碑圖云天
下碑錄以為鍾會書此記初平五年立魏書云會以
正始中為尚書郎注謂其弱冠登朝蓋已在初平四
十年之後矣謂之會所書者非也輿地碑目云鍾會

於晉咸熙元年始入蜀距漢興平初禊已七十一年
不應追書也

盧豐碑 建安七年 未詳所在盧君為江州夷邑長
今四川重慶府巴縣漢之江州也或即在其地 此
碑集古金石二錄與隸釋隸續俱不載見字原碑目
云蜀人謂之漢夜郎碑

樊敏碑 建安十年 輿地碑目云在雅州墨寶云在
廬山縣雅州今隸四川廬山縣屬焉隸釋云在黎州

非是 額題云漢故領校巴郡太守樊府君碑十二
篆字為二行碑圖云兩獸蟠其上就為圭首若今所
謂顛負者其一有鱗猶龍然篆額兩行偏其右文在
穿右凡十八行行三十九字空一行刻亂曰二行又
空一行低十三字刻歲月及書造人姓名其云石工
劉盛息懔書者劉刻其石而厥子落筆也陳球碑陰
書其二故吏之子亦曰息崇寧壬午知縣丘常題其
碑陰云此碑相傳為魏受禪碑而此乃建安十年所

立又在黃初之前雖暴露中野而字畫醇古文尚可
讀余因扶其既倒植其將立又為屋以庇之庶幾永
其傳也紹興己卯眉山程勤又題云僕仕於廬山廼
得樊君故碑於荒山榛莽間亟作大屋覆其上表而
出之碑陰所記崇寧壬午距今五十八年而任斯邑
者皆吾鄉人扶倒植仆偶相似然全蜀藝文志又載
李一本跋云此碑踞於道周幾千餘歲在宋以前訛
為魏受禪碑一統志謂其文字漫滅不可考以故惑

於聞見者不為注目弘治乙未偶憇其下因束篠為
帚拂之條見字畫隱隱而出亟為磨洗榻得墨本然
其模糊不可讀者亦過半矣金石文字云重刻本字
甚拙惡

高頤碑 建安十四年 隸釋云在雅州興地碑目云
在嚴道縣東二十里嚴道縣今廢省其地入雅州

額題云故漢益州太守高君之碑十隸字為二行碑
圖云兩螭蟠其首文在穿下凡十八行行二十一字

高頤闕 闕有二其一云漢故益州太守武陰令上計
吏舉孝廉諸部從事高頤字貫方其一云漢故益州
太守陰平都尉武陽令北府丞舉孝廉高府君字貫
闕一字隸釋云此兩闕一有高君名字一不稱名而
字闕其一予所見六十年前石刻貫字之旁刻名闕
一字近世所見乃有以光字補之者此一闕雖無頤
之名而陰平北府皆見之碑則兩者皆高頤之碑也
輿地碑目以高府君為高君實貫下有光字云高君

兄弟皆孝廉非是

熊君碑 建安二十一年 隸釋云在道州 額題云
漢故綏民校尉騎都尉桂陽曲紅灌陽長熊君之碑
二十篆字為五行碑式云文十七行行五十五字財
及碑之半其後空數行書文春事又空一行書杜暉
事末行書年月及工師姓名與杜暉相隔亦數行許
銘之後追叙君今別作行隸釋云漢人書墓闕及神
道則有盡列其生平所歷官者及銘志則舉其所終

或所歷之清高者題之其叙先世但云某君之孫某君之子既不名其祖父亦不著其德美此碑獨異於他刻高曾之間又有祖父旻其上闕文蓋伯叔祖也祖之下云君喬字漢舉喬上亦闕一字必父也碑首熊君名字亦殘缺歐陽公以喬為綏民非也碑後載茶陵長文春重安侯相杜暉二人官壽行事各數十言似是同郡盛德之士作文者惜其無所記錄故附之左方也

黃龍甘露碑 建安二十四年 輿地碑目云在眉州
彭山縣之黃龍鎮彭山縣今廢省其地入眉州 額
題云黃龍甘露之碑六隸字隸續云碑中有穿高五
尺餘廣三尺文十行僅有數字可辨羣臣列名居石
之二上下四橫每橫二十餘人可辨者侍中二人司
徒尚書五官中郎將大中中散大夫博士各一人議
郎四人安漢鎮東等將軍二十餘人官之下皆稱臣
姓名碑側題太守李嚴并丞令二人華陽國志云建

安二十四年黃龍見武陽赤水九日乃立廟作碑墨
寶云眉州彭山縣即漢武陽縣地也

黃龍甘露碑 建安二十六年 輿地碑目云在隆州

籍縣江口墨寶云在眉州彭山縣本朝人題云時以
甲辰歲治平元年三月二十七日轉移此碑蓋從隆
州移置眉州也 額題云黃龍甘露之碑六隸字隸
續云碑亦有穿高五尺餘廣二尺文十四行惟首行
有建安廿六年數字可辨建安二十五年漢祚已終

次年四月蜀主方稱帝改元則辛丑之春蜀人猶奉漢代正朔故有建安二十六年之文

黃龍甘露碑陰 隸續云存者上兩橫每橫三十人可辨者侍中議郎從事史中郎將數十人兩橫之下崇寧中為王時彥所磨刻其說

梁休碑 建安二十七年 天下碑錄云在襄州穀城縣襄州今為襄陽府穀城縣屬之 隸續云司徒掾梁君碑篆額惟存掾碑二字碑錄云建安廿七年立

此黃初前一年也豈吳人尚有用漢歷乎否則誤字也

唐公房碑 無年月 集古錄目云在興元府墨寶云在城固縣西北三十里興元府即今陝西漢中府城固縣屬之 額題云仙人唐君之碑六篆字為二行碑圖云圭首偏右其內有暈一重又兩重在其左暈下脚去穿頗遠穿下即刻文所存者十七行行三十一字其後石已裂水經注云智水川有唐公祠唐君

字公房固城人也學道得仙百姓為之立廟於其處
刊石立碑表述靈異也隸釋云漢中太守郭芝立公
房王莽時人博物志云城固縣婿鄉有唐公昉得道
雞犬皆升仙後漢志褒中有唐公昉祠蓋隸法房字
其戶在側故闕人多不曉或作昉或作昉皆誤也集
古錄亦作公昉碑

唐公房碑陰 碑圖云一橫十五人

劉熊碑 無年月 金石錄云在酸棗縣天下碑錄云

在酸棗縣古城內集古錄目以為在今揚州非也碑
已不存舊有拓本藏寒山趙氏余從摹得之 隸釋
云酸棗令劉熊碑篆額石一行微有棗令劉字則知
所題非十即八也水經云酸棗城有縣令劉孟陽碑
今碑孟下損其一字歐陽公不知碑在酸棗無以名
其官遂謂之俞鄉侯季子碑唐王建題此碑詩云蒼
苔滿字土埋龜風雨消磨絕妙辭不向圖經中舊見
無人知是蔡邕碑元祐中蘇邁書胡戢之語謂此與

劉寬碑同建詩為不誣予謂此固漢隸之上品似非
中郎筆法都穆金薤琳琅云建生於唐其云蔡邕碑
者蓋本之圖經而非鑿空而言洪氏不當於此而疑
之也

劉熊碑陰 隸釋云其可見者百八十人不書郡邑皆
酸棗人也

苑鎮碑 無年月 未詳所在字原云或云在襄州即
今襄陽府 額題云漢故荊州從事苑君之碑十篆

字碑式云碑十五行行二十四字穿在第八九十行之間第一字之下各廢四字隸釋云苑君名鎮無所終歲月

督郵斑碑 闕年月 字原云在徐州無額碑首行云督郵諱斑字子翁隸釋云碑無額故不得其姓石既碎落故不知其所終

衡立碑 無年月 金石錄云在鄆州中都鄆州今為東平州中都今為汶上縣俱屬兗州府 金石錄云

碑云君諱立字元節其先出自伊尹而其銘曰於穆
從事歐陽公集古錄號為元節碑儀令衡君之碑蓋
漢時石刻其官爵姓氏既載於額則其下不復更著
苟文已殘缺又不見其額則遂難考究矣立與衛尉
卿衡方墓皆在今鄆州中都方碑亦云其先伊尹號
阿衡因以氏焉隸釋云趙氏曰碑有額予亦未之見
也石多缺惟銘尚可讀元節碑落十九字且云疑其姓伊而為從事也今碑首
尚完題
云浚

劉曜碑 闕年月 天下碑錄云在鄆州須城縣鄆州
即今東平州須城縣今廢省其地入東平 額題云
漢故光祿勳東平無鹽劉府君之碑十四篆字隸釋
云漢人銘墓以郡邑題其首者所見惟此一碑集古
錄云文字磨滅僅有存者卒葬年月皆不可見按歐
洪兩家皆云有陰而其書不載

金恭碑 闕年月 隸釋云近歲出於雲安軍土中雲
安軍今為雲安縣屬夔州府 無額首行題云金君

碑君下缺二字碑式云碑有畫方之紋上亦有穿題
一行文十行後餘三行所存者行十三字隸釋云其
石剥缺少有可句者金掾季本即其父也二弟曰廣
延曰雍直其母徐氏有紀產碑按徐氏紀產碑刻於
光和元年其碑云子男恭字子肅早終此碑蓋刻於
光和之前也

金恭闕碑圖云上刻一禽三足次橫刻金君姓名次
刻一人執扇乘馬似是金君也旁有龍虎銜環其下

斷裂

中部碑 無年月 字原云在均州今屬襄陽府 額
題云中部碑三隸字為一行碑圖云額偏其左額上
有白暈一重其右復有兩暈不匝字在暈下穿在字
中所廢者三行各四字隸釋云凡題名五十餘人如
漢世碑陰而有額謂之中部殊不可曉石理漫滅名
字僅有存者

富春丞張君碑 闕年月 字原云在亳州 額題云

漢故富春丞張君碑八篆字隸釋云張君之名髣髴如湏字土人以為張湛非也碑載其父兄而官稱磨滅誌文多不成章而銘詩可讀其間云三年癸亥景命不祿考東都歷年凡三癸亥永平與光和之六年延光之二年是也建光有三年則歲在癸亥但次年壬戌已改延光毫社去洛陽不遠不應踰兩載而不知改元也復齋碑目云地志順帝分會稽置吳郡富春屬焉今碑除吳郡下缺當在順帝之後為富春三

年而卒爾

郎中郭君碑 無年月 未詳所在 額題云漢郎中

郭君之碑七隸字隸釋云名字皆缺文辭亦有可句者其云惠兄仲犀郭仲奇碑常有惠兄之稱此碑復爾仲犀者若非仲奇之伯仲則其同族也

城埧碑 闕年月 字原云在渠州今為渠縣屬順慶府 隸釋云右無名碑蜀人謂之城埧碑末有方三百里圍二尺字及用人用日數似是記板築事按碑

有云有詔拜君益州太守又云闕功後世蓋益州太

守築城垣以衛民故立此碑以頌其功德也

是邦雄桀碑 闕年月 字原云在渠州 碑圖云其

上刻麟其下則牛首碑十一行行二十六字有以兩
字居一字地位者其後空三行許隸釋云碑之首云
是邦峻生雄桀峻之上下各闕一字蓋言其山川孕
秀也其間有晉楊侯苗由彼適梁隸為武陽之句疑
其姓楊而家隸為字畫類李翊碑又有碑陰上朱鳥

而下玄武則沒字碑也碑圖云與馮緄墓道一碑相
類非磨滅者

仲秋下旬碑 闕年月 墨寶云在綿州 字原云額

五字上二字不可辨第三楊字第四元字第五似秀
字而不明碑式云有穿兩旁有大白紋如暈之狀碑
十三行行二十三字其上一半皆漫滅隸釋云字畫
清逸頗類劉寬碑但石損字闕所餘無幾復齋碑目
作楊元君仲秋下旬碑墨寶云俗以為文處茂碑

司馬季德碑 闕年月 未詳所在 無額碑首行云

故山陽府卒史防東守尉司馬缺字季德其名闕金

石錄作山陽卒史司馬留碑蓋趙氏所見其名猶未
闕也隸續云山陽府卒史防東守尉者以郡曹而攝
邑官具本秩自如故猶今之兼權也防東二字頗晦
昧難辨故趙氏以山陽卒史名之

薛劉二君斷碑 闕年月 輿地碑目云在重慶府

額題云漢故益州刺史中山相薛君巴郡太守宗正

卿成平侯劉君碑二十四隸字為四行隸續云隸額頗雜篆體其碑彷彿二十行所餘其上一段他石斷裂不存矣第一行有益州刺史中山相薛八字第三行有巴郡太守宗正卿成八字第三行有惟二君三字餘皆不可句讀蓋前兩行各舉其官後行始是碑語與廣漢屬國辛李二君碑正同其間有祭死者及薛劉征討事殆是紀述平寇之事趙氏誤以為墓刻故云古無兩人共立一碑又以劉君為成平侯相詳

視其額初無相字蓋王子侯也

司空殘碑 闕年月 金石錄云政和乙未得於洛陽
天津橋之故墓 隸續云所存五行行九字皆銘詩
也字徑二寸餘雄健清新蓋漢代之神品其詞有云
命爾司空故趙氏謂之司空殘碑

司空殘碑陰 金石錄云故吏題名百餘人尤完好筆
法不減蔡邕石經

司農劉夫人碑 闕年月 隸續云在宜興夫人冢傍

無額碑式云題一行文七行行三十八字石尚餘其半亦隱隱若字隸續云夫人漢太尉許馱之室也首行有標題之文石已剝所存數十百字其漫漶者強半惟次行獨全故知其為劉氏其辭惟數句可讀字畫多雜篆體所書以字全類孔宙碑其他偏旁多與故民吳公碑中山相薛君題額相類應劭漢官儀所載三公孝靈時有吳郡陽羨許馱范紀光四年馱以衛尉代劉寬為太尉吳處厚青箱雜記云義

興有許馘廟其碑許劭所作唐開元諸孫重刻今其殘碑纔有數十字其間載許君自司農遷衛尉此又稱劉氏為司農夫人則銘墓時許猶未為衛尉也其碑在光和之前無疑

禹廟殘碑 闕年月 未詳所在 隸續云禹廟一小碑其上漫滅五之三其前漫滅四之一所存者少成句讀唐寶曆中三人同觀刻名其上趙氏有禹廟二碑其一云字畫淺細有皮氏長安定蘇字恐是此一

碑今按碑文無皮氏長安定蘇字趙氏所錄乃別是一碑非即此碑也

魯相謁孔廟殘碑 闕年月 字原云在兗州 隸釋

云右無名碑首尾上下皆碎裂餘石纔有數行詳其辭非是諛墓中人者亦非頌德政紀工役之前有帝命策授俾相于魯吉月令辰欽謁十四字又云春秋烝嘗幾以獲福蓋是謁廟之文後有訪之儒彥稽之典謨聖德設章及昔在周人之句似皆是鋪張孔

子也中云覽鴻基之曠蕩觀林木之穹深似指孔林而言或題為駐蹕亭前斷碑蓋在闕里中亭趙氏著錄有魯相謁孔子碑而無其說疑即此也末有叔德仲雅題名而亡其姓

夏堪碑 闕年月 字原云在亳州鄆縣亳州今屬鳳陽府鄆縣今廢併其地入永城縣屬歸德府 額題云故相府小史夏堪碑八隸字金石錄云後有銘銘三字語頗古其卒葬年月殘缺字雖不工然漢碑也

隸釋云文則崛奇字甚怪陋有難以意會者

雍勸闕碑 無年月 輿地碑目云在梓潼縣北二里

梓潼縣今屬四川保寧府 碑式云漢故趙國相

雖府君之闕十大隸字為兩行其文一面五行一面

三行行二十三字第七及第十五字下皆有橫畫第

一重惟首行及第四五行則七字餘皆虛其下一字

金石錄云其前歷叙家世官爵而所述雖君事甚略

故吏民漢中太守邯鄲某等慕戀恩德刊石稱頌焉

隸釋云此碑全類魏晉間所書劉備及劉淵國中所
刻碑亦題為漢存於今者如車騎將軍關成獻王碑
是也此刻甚可疑但無年歲可證趙氏又寘諸漢碑
中故存之

郭輔碑 無年月 集古錄目云在襄州穀城縣襄州
今為襄陽府穀城縣屬之 額題云郭先生之碑五
篆字為一行碑圖云其圭首偏左方右暈三重左一
重字接暈下凡十一行行三十字穿在第一字之下

銘後三行各廢三字自額之左皆文之餘集古錄云其文字古質蓋漢之碑也金石錄云按後魏酈道元注水經具載此碑云碑無年號不知何代人然則歐陽公何所據遂以為漢人乎余以字畫驗之疑魏晉時人所為既無歲月可考姑附於漢碑之次隸釋云碑有兩昭字晉人所諱疑此是魏刻

嚴發殘碑 闕年月 未詳所在 碑式云所存十二行行十字隸續云此碑不見歲月疑其非漢刻雖字

不工却不類魏晉以後書法

詔賜功臣家字 無年月 字原云在成都府 隸釋

云詔賜功臣家五大字今在蜀中似是漢人所書其
不可詳也墨寶云郭氏犂地得之又有小字一刻永
平五年四字贊井襍之壁間今不存按此四字又是
一石非五字之紀年也

學師宋恩等題名 無年月 隸釋云在成都周公禮
殿門之西序 字原云碑凡二一列經師經掾一列

文學師諸曹掾史隸釋云漢永平中嘗為四姓小侯立五經師此則蜀郡諸生也當是郡守興崇學校者鐫石紀德諸生既刻姓名而諸曹史亦綴其末惜亡其碑不可考爾成都又有左右生題名一巨碑蓋左學右學諸生也其間江陽寧蜀晉原遂寧乃蜀晉所置郡歐陽公以為漢文翁學生題名非也

故吏應酬殘題名 無年月 字原云在成都府墨寶云得之北門魚橋之下 隸釋云題名共三十人此

石所存者橫兩行爾上行兩人之後則有右郾字其
下一行凡十五人末有左江原字二邑皆隸蜀郡此
蓋蜀郡太守碑陰也墨寶云後無字非碑陰蓋斷碑
爾

宗季方等題名 無年月 隸續云在龍門禹廟 碑
式云兩橫列上一列二十一人下一列二十人隸續
云趙氏錄禹廟凡二碑皆在龍門

其一有皮氏長劉尋丞樊璋姓名而無陰其一有皮

氏長安定蘇字而文已磨滅其陰則有汾陰趙遺數十人姓名官爵最後有龍門復民二十五戶人名此碑二列有四十一人姓名疑是龍門復民而多少與趙說不合蓋別一碑也題名之上有文十餘行乃唐開元中龍門令呂延祐所作禹廟頌楚順八分書亦猶魏子廟碑後人刻於石之空處耳

蘇衡等題名 無年月 字原云在兗州 隸釋云題名三十餘人蓋東郡平原北海陳留汝南潁川梁國

下邳南陽東平十郡之士也姓名多已淪沒或云碑
在孔里駐蹕亭前或題云孔府君碑陰

舉吏張玄等殘題名 無年月 未詳所在 隸續云

其可見者舉吏汝南一人故吏河內一人門生東郡
三人門生濟南二人門生平原任城各一人薛令有
其官而亡其姓名惟虞升一人郡邑名字及所出錢
無一字缺者

公乘伯喬殘題名 無年月 未詳所在 隸續云所

存者一列二人廣都及郫皆蜀郡之邑蓋西川之殘碑也

繁長張禪等題名 無年月 輿地碑目云在梁山軍忠州界隸續云一石三橫首行云長蜀郡繁張君諱禪字仲聞其次題掾曹十人及三人姓名次橫之首行云夷淺口例掾趙陵字進德次夷侯九人邑長三人第三橫邑君三人夷民六人後云凡卅八戶造末有四行高出兩字題白虎二夷王及丞尉名字最後

兩行及其下一橫字畫差小似是紀事之辭惟夷王
謝資數字分明餘皆不可讀東都益部郡縣夷漢錯
居此必蜀郡太守有德政繁縣人共立此碑尊其官
吏故書之前列輿地碑目作浮蘭碑云是漢刻

酒泉題名 無年月 未詳所在 字原云碑九列每
列三十二人

交趾都尉沈君神道 無年月 輿地碑目云在大竹
縣北一里隸釋云在梁山軍大竹縣今屬四川順慶

府梁山軍即今夔州府梁山縣也 輿地碑目云雙
石闕其一鐫云漢謁者北屯司馬左都候沈府君神
道其一鐫云漢新豐令交阯都尉沈府君神道字原
云沈字左字道字豐字發筆皆長過三四寸許令字
交字兩筆皆長君字中筆亦長碑圖云其上皆刻朱
鳥其下則右刻元武左刻一獸之首若虎而角環在
口已缺其爪據之隸釋云二神道蓋是一人猶王稚
子闕盡書其所歷之官也

金君闕 無年月 字原云在雲安軍即今夔州府雲
安縣 題云鉅鹿太守金君闕凡七字碑式云四旁
皆刻磨紋

楊宗墓道 無年月 字原云在嘉州輿地碑目云在
夾江縣東十里嘉州即今四川嘉定州夾江縣屬之
輿地碑目云墓前雙闕其左隸書漢故益州太守
楊府君諱宗字仲德墓道十六字金石錄作楊宗墓
闕銘

清河相張君墓道

無年月

未詳所在

題云清河

相弘農太守張君墓凡十字墓下闕一字隸釋云一碑甚大其中但存此數字惟河相弘農君五字點畫具爾碑式云兩旁有白紋其碑長八尺餘濶三尺餘此數字之下尚有三之二

不其令董君闕

無年月

字原云在濟州即今濟寧

州 題云漢故不其令董君闕八字為二行天下碑

錄云漢童恢墓雙闕字在任城縣南七里一云漢故

不其令童君一云童恢瑯琊人隸釋云東漢循吏有
童恢傳注云謝承書作僮种兩姓異同史氏固有所
疑矣初未嘗見此闕遂以董為童以碑為正傳云恢
字漢宗琅邪姑幕人辟公府除不其令其為令在楊
賜罷相之後則恢蓋孝靈時人也此闕刻一冢冢上
三物植立若木葉然二男子拜於前有一婦人二稚
子又有六婦人魚貫於後冢旁有一大樹其下有一
馬立於木下及馬後者各一人馬前有數物如雞鶩

之狀者碑圖云所畫者子孫展墓之狀有僕馬休於
松楸之下所題八字其左復有四五小字不可辨碑錄所
載董君雙石闕字此蓋其一也隸文董字下著童
碑錄及范史誤去其十張駒云嘗見不其令一碑數
百言其字大小如防東尉司馬君碑亦多漫滅者當
是彼一闕也

縣竹令王君神道 無年月 字原云在涪州 題云
廣漢縣竹令王君神道凡九字隸辨云微雜篆體縣

字作曰下木略與縣字相混故趙氏誤作廣漢縣令
而謂其借苓為令按金石錄又誤合劉讓閣道題字
為一碑故以為建寧元年十月造而此碑則無年月
也字原既辨其誤又云建寧元年立何耶

司馬孟臺神道 無年月 字原云在漢川今為漢川
州屬成都府 題云故上庸長司馬君孟臺神道凡
十一字隸釋云石文皴剥而字札甚精復齋碑目作
上庸長闕

高直闕 無年月 字原云在雅州 題云漢故高君
諱直字文玉凡九字隸釋云字畫甚不工漢人題墓
有云神道者有云墓道者有云闕者惟高頤及高直
但書姓名字爾

韋氏神道 無年月 字原云在均州州今屬襄陽府
碑圖云其上重暈與埋銘同中刻此四字隸釋云
石文中斷似若韋字爾

征南將軍劉君神道 無年月 未詳所在 題云有

漢征南將軍劉君神道凡十字隸續云大小與王稚
子闕相類而剛勁過之惟後兩字剝損

平楊府君神道 無年月 字原云在綿州今屬成都
府 題云漢平楊府君叔神道凡八字字原云刻於
石闕椽首墨寶云平楊必姓名如建平太守之類叔
其字也隸續止有平楊府君叔神六字

沛相范君闕 無年月 輿地碑目云在梓潼縣東六
里 天下碑錄云漢沛相劔門范皮闕墓文字不甚

多記名目而已隸續云圖經有范伯皮闕蜀人云范君有二闕周四十六字多磨滅今在鳳皇山寺前麥田中近得范君一闕其上橫刻四字尚可認曰府君神道字之下刻四人物次橫又有一馬最下三方有白紋其中似嘗刻字闕上四人皆向右行更有一石其人却向左行恐是范之右闕闕旁之甃堅厚如石其重十斤田夫耕鑿時或得之上有小篆韻語每甃十行行一句一在汪聖錫家其文曰嗟痛明時仲治

元年結僮孳孳履踐聖門知辨賜張闕 嘿孔言寬博

闕 約性能淵泉帶徒千人行無遺愆予亦得其一云

德積未報曷尤乾坤茂而不實顏氏暴顛非獨范子
古今皆然想貌睹刊列畫諸先設徃有知豈復恨焉
石上姓名雖淪滅而甄文有范子可證乃知范君名
皮字仲治圖經誤衍伯字按輿地碑目作沛國范伯
友墓石闕則又誤相為國誤皮為友

汝南上蔡令神道 無年月 字原云在閬州即今四

川保寧府 隸續云閬州城外一石闕其東面刻十
三字與王稚子闕相類蜀人謂之汝南令闕眎其文
南之下一上字甚分明蓋汝南之上蔡令也徐求閬
苑記以為唐貞觀中旌表王氏義門所立謬也

侍中楊文父神道 無年月 未詳所在 題云漢楊
侍中文父之神道凡九字隸續云字體格與馮幽州
闕相似必西州所刻者

貞女羅鳳闕 無年月 未詳所在 題云漢貞女羅

鳳墓凡六字隸續云筆勢甚清逸頗類景謁者墓表
字之上以朱爵為額蓋墓闕也

延年樽字 永初七年 隸續云在蜀中 其文云永
初七年四月卅日造馬是萬歲延年益壽郭凡十八
字為三行

种氏石虎刻字 光和七年 未詳所在 其文云光
和七年四月五日孝子种覽元博所造共十六字

交州刺史石羊字 無年月 字原云在郴州 隸續

云第一行有趾刺史三字上減其一當是交字第二
行有君羊二字上減其一土人謂之鄧君家闕文乃
其姓也此墓道之石羊膊上刻建安以前之物

六藝之一錄卷一百十五

欽定四庫全書

六藝之一錄卷一百十六

錢唐倪濤撰

石刻文字九十二

顧南原碑考

比干墓字 無年月 字原云在衛州比干墓上 水
經注云比干冢前有石銘題隸云殷大夫比干之墓
所記惟此今已中折不知誰所誌也隸續云僅有殷
比干墓四字比水經闕其三字畫清勁乃東都威靈

時人所書者收碑如歐趙皆未之見石公弼跋云世傳孔子書然隸始於秦非孔子書必矣字畫勁古當是漢人書

四老神坐神祚機刻字 無年月 金石錄云在惠帝陵旁隸釋云商於農人畊地得此 一刻云圜公神坐一刻云圜公神祚機一刻云角里先生神坐隸釋云神坐及神祚几四人當各有之今綺季角里尚闕其一而黃公者未見金石錄作四皓神位刻石跋云

驗其字畫蓋東漢時書廣川書跋云重畫深鑿其書甚完

五君栢棹文 無年月 東觀餘論云在洛陽上清宮

隸續云五君栢棹文十五字予所見者已裝治成帙不得詳其形製五君之旁有棹各三徑三寸餘其中者圓若碑碣之穿上下二棹則墮褊不勻亦有闕其一者藏碑若歐趙皆所無有復不見於諸家雜說中殆莫知其為何物獨武陽黃伯思長睿作洛陽九

詠其瞻上清一篇中云窪枰五兮石枰九饗西后兮
殿東后所注甚詳注云宮中有石上列圓穴五橢穴
九俗謂之九卵石側各有題記曰太老君真人君仙
人君東海君西海君字與漢人隸法同其穴初無刊
刻之跡乃漢世所作以祠真仙耳圓者代枰橢者代
枰就石為之若窪尊之類或謂晉世仙人白仲理作
此煉丹非也蓋字畫類漢世隸不類晉體又東觀餘
論載政和中黃君瞻上清跋語云此碑帙有五石枰

梓又故書於石且云欲考栢梓所以者觀此可知也
宣和殿藏碑錄以為漢碑面名之曰真人君石樽刻
與四老神祚机刻石同帙良由此石就其上有器物
之狀以祀五君故或謂之栢梓或謂之石樽而黃君
之詞可據始知是洛陽上清宮之物其文惟太老君
三字最大蓋尊老子也西海真人六字却似晉人筆
札豈鐫刻有工拙乎

李剛石室畫像 熹平元年 水經注云鉅野黃水南

有荊州刺史李剛墓鉅野縣今屬兗州府 隸續云
荊州刺史李剛石室殘畫象一軸高不及咫長一丈
有半所圖車馬之上橫刻數字云君為荊州刺史時
前後導從有騶騎有步卒標榜皆湮沒在後一車碑
失其半止存東郡二字向前一車車前有榜惟郡太
守三字可識前後亦有騶騎步卒及沒字榜又一車
僅存馬足大半無碑少前六騎形迹結束胡人也其
上亦刻數字惟烏桓二字可認漢長水校尉主烏桓

騎又有護烏桓校尉此以烏桓為導騎必二校中李
君嘗歷其一齊宣王侍郎凡三牘車前一牘無字其
一四人三牘惟梁高行梁使者二牘有字其一四人
樊姬楚莊王孫叔敖梁鄭女凡四牘後有一牘而闕
其人水經云剛字叔毅山陽高平人熹平元年卒有
祠堂石室三間四壁隱起彫刻君臣官屬龜龍麟鳳
之文閩人李丙仲南得此碑於西州馮方圓仲宛轉
假借而得之酈氏所載古碑百餘惟李剛魯峻二墓

有圖畫趙氏雖云曾得魯君畫象而碑錄中無其目此碑則自來好古之士未之見也

魯峻石壁畫象 熹平二年 字原云在濟州今為濟

寧州 隸續云畫象二石並廣三尺崇二尺水經云

金鄉山司隸校尉魯君冢前有石祠石廟四壁皆青

石隱起刻書契以來忠臣孝子烈婦孔子及七十二

弟子形象象邊皆刻石記之此石上下三橫首行一

牘云祠南郊從大駕出時次有大車帳下騎鮮明騎

小史騎凡十六牘大車之上牘三字上兩字略有
左畔偏旁似是校尉騎字車前兩旁鮮明八騎步於
中者四人鈴下三十餘騎如魚鱗然列兩行橫車之
後後有駙馬二匹帳下一騎小史持幢四騎次橫薦
士一人有牘奏曹書佐主簿車各一牘有車馬騎史
僕射二騎鈴下二騎各有牘第三橫冠劔接武十有
五人一牘闕里之先賢也次石上橫兩牘云君為九
江太守時車前導者八人後騎石損其半少前一牘

云功曹史導有車馬車前二騎牘減中橫但刻雲氣
下橫十有六人形象標牘與前石同後漢志大駕鹵
簿五校在前按魯峻碑嘗歷九江太守終於屯騎校
尉從駕南郊乃屯騎之職藏此者不知為何人碑既
有九江標牘又有屯騎職掌更有先賢形象定為魯
峻石壁所刻其誰曰不然其一之上橫盡圖人物主
坐客拜侍於前後者六又主客三人列坐侍者四中
橫三車又一車導騎二一車兩人在前一車一人在

後屋下之人三五賓主三車有標牘皆湮滅下橫十
七人如前石所圖聖門高第人亦一牘一字不可認
其一則上橫七騎皆右馳中橫二車一有一導騎一
則倍之末有五人在屋下二褲子在屋上下橫兩羶
車皆駕以一馬又一車有導騎二末有五人在屋下
立車皆有牘惟四導騎者上下各有字粗可認上曰
君下曰郎魯君再為議郎豈謂是乎以其冠劍人物
絕類九江石壁所刻疑此二石亦是魯祠四壁者後

漢志列侯會耕祠導從中有鮮明卒朱氏畫史朱浮墓石壁人物有鮮明隊或者不能細認先賢姓字但見有鮮明數牘遂謂是朱浮墓壁畫象非也

武氏石室畫象 無年月 在濟寧州宋方務德有重刻本 金石錄云武氏有數墓在今濟州任城墓前有石室四壁刻古聖賢畫象小字八分書題記姓名往往為贊於上文詞古雅字畫遒勁隸釋作武梁祠堂畫象云石有六其五則橫分為二梁高行簡相如

二段又廣於他石所畫者古帝王忠臣義士孝子賢婦各以小字識其旁有為之贊文者其事則史記兩漢史列女傳諸書合百六十有二人有標題者八十人其十一人磨滅不可辨又鳥獸草木車蓋器皿屋宇之屬甚衆趙德夫題云武氏石室畫象趙君東人當知其實而不能辨此畫為武氏誰人冢前者予案任城有從事武梁碑元嘉元年立其辭云孝子仲章季章季立孝孫子僞躬修子道竭家所有選擇名

石南山之陽擇取妙好色無斑黃前設壇墀後建祠堂良匠衛改雕文刻畫羅列成行攄逞技巧委蛇有章似是謂此畫也故予以武梁祠堂畫象名之愚按畫象中所題魯莊公莊字不避明帝諱似非武梁祠堂所刻梁蓋卒於桓帝時也其詳見陽韻莊字下武氏有數墓不能定此刻為何人墓前者當從金石錄題為武氏石室畫象可耳碑圖云武梁祠堂畫記自伏羲至於夏桀齊公至於秦王管仲至於李善及萊

子母秋胡妻長婦兒後母子義漿羊公之類合七十
六人其文字磨滅與初無題識者又八十六人連帥
方務德重刻郡齋地遠歲久殆將亂真也今華山馬
氏有此重刻本予從而摹得之

成王周公畫象 無年月 未詳所在 碑圖云君臣
侍御凡九其後者一馬有小字標榜曰成王周公

孔子見老子畫象 無年月 隸續云人物七車二馬
三標榜四惟老子後一人榜漫滅孔子面右顴雁老

子面左曳曲竹杖中間復有一雁一人俛首在雁下
一物拄地若扇之狀石有裂文不能詳辨侍孔子者
一人其後雙馬駕車車上一人馬首外向老子之後
一馬駕車車上亦一人車後一人回首向外史記魯
昭公予孔子一乘車兩馬一豎子同南宮敬叔適周
問禮於老子此畫聖輿兩驂似是據此

太尉公墓中畫象 無年月 字原云在資州內江縣

資州今為資縣與內江縣俱屬成都府 隸續云太

尉公墓中畫象蜀人謂之燕王墓人物未知何所依
據一石橫四寸高二尺有半兩巨人高坐右方有伏
尉公三字左方有右將軍韓侯子本七字又一石七
人分坐三席其中一席二人題其左曰高陵侯右曰
曲闕侯人物字畫比前石甚小伏尉公蓋是用伏為
大即太尉公也建武中右將軍官廢漢末方復有之
益州十二郡國二百年間五人為三公至太尉者南
鄭李固成都趙戒戒之孫謙二趙在威宗獻帝時成

都去內江不遠豈其冢墓耶

功曹史殘畫象 無年月 未詳所在 隸續云為旁

行者四第一行凡五車中車而坐者一人御者亦一人自第二車復有一人踵其後右執杖左執一物如扇之狀最後別有一人石缺不能盡見第二行導者二人左執管而吹之其右則石缺凡三車車後不復有人最後人一車纔見其馬之半第三行導者四人右執鏡左執管凡兩車最後又一車則見其人之半

面第四行一人乘馬在前次二車其前車亦有一人
隨其後最後又一車亦見其馬之半車各一馬有蓋
左方通下三行為一可見者二大車後有二馬奴隸
凡六人其前則缺矣其標牘可識者五曰功曹史曰
門下督曰下賊曹曰曹史曰督郵

雍丘令殘畫象 無年月 未詳所在 隸續云所存
者八車十三馬有一車不全見車上之人有十六馬
上之人四奔走於車馬之前者四人標牘曰泰山為

雍丘令

尉府壺壁甄文 陽朔四年 未詳所在 文四行十

六字云尉府壺壁陽朔四年正月始造設已所行分
行作碁局大眼金石錄云字畫奇古西漢文字世不
多有此字完好可喜然所謂尉府壺壁又云已所行
者莫曉其為何等語隸續云西漢字見於彝器者皆
是篆文此甄略有隸體

永平甄文 永平八年 未詳所在 隸續云文四行

九字云永平八年七月廿日作

汝伯寧甄文 建初三年 未詳所在 隸續云文六

行十八字云建初三年八月廿日汝伯寧

闕

萬歲舍

大利善與曹叔文甄所謂萬歲署舍同或是卜築所用者漢人無忌諱如此

曹叔文甄文 建初七年 未詳所在 隸續云文八

行三十一字云建初七年八月十三日曹叔文作千

萬歲署舍命史後子孫貴昌

闕

未央大吉

謝君墓甄文 元和三年 未詳所在 隸續云文四

行十五字云元和三年五月甲戌朔謝君闕造此甄

墓

永初甄文 永初元年 隸續云近歲出蜀中 甄有

二其一直書一行云永初元年景師造其一云大吉

羊宜侯王

永初官鑿文 永初七年 字原云眉州人掘武陽故

城得之文一行七字云永初七年作官鑿隸續云范

至能在蜀得其二惟七及官字文有反背不同重有
十八斤

魏大饗碑

延康元年

隸釋云在亳州譙縣

額題

云大饗之碑四篆字為一行碑式云有穿穿旁有刻
螭之紋磨滅不全文十九行行二十字隸釋云相傳
為梁鵠書漢獻帝建安二十五年曹丕嗣位改元延
康魏志云丕以七月甲午軍次於譙大饗六軍是時
漢鼎猶未移也不為人臣而自用正朔可謂無君之

罪人也士大夫櫝藏其碑者特以字畫之故爾金石錄云唐大中五年亳州刺史李暨以舊文剝缺再刻於石舊碑斷續不可盡識此特完好

魏公卿上尊號奏 延康元年 集古錄目云在許州額題云魏公卿上尊號奏九篆字為二行字作陰文凸起碑式云文二十二行行四十九字先王及高陵兩武王三陛下皆平闕有奕局之紋自陛下即位後十行刻於碑陰二陛下亦平闕集古錄云唐賢多

傳為梁鵠書今人或謂非鵠也乃鍾繇書爾未知孰是隸釋云其中有大理東武亭侯臣繇者乃其人也當時內外前後勸進之辭不一此蓋刻其最後一章碑自造於華裔之後石理皴剝字跡晦昧今世所傳者多是前一段耳金石文字記云此文當在延康元年而刻於黃初之後舊刻殘缺予見拓本於北海孫氏僅存數十字今在許州者重摹本也

魏受禪表 黃初元年 集古錄目云在許州魏文帝

廟中 額題云魏受禪表四篆字為一行作陰文凸起碑式云文二十二行行四十八字先皇及皇帝五皇帝皆平闕亦有奕局紋劉賓客嘉話云王朗文梁鵠書鍾繇鐫字謂之三絕集古錄云顏真卿又以為鍾繇書莫知孰是此碑舊刻亦已殘缺今所傳者重摹也集古錄作魏受禪壇記

魏封孔羨碑 黃初元年 今在曲阜縣孔子廟中

額題云魯孔子廟之碑六篆字為一行有穿文二十

三行行四十二字制詔皇上聖皇三行皆平闕隸釋
云嘉祐中郡守張稚圭按圖經題曰魏陳思王曹植
詞梁鵠書魏隸可珍者四碑此為之冠與大饗碑蓋
不相遠若繁昌兩碑則自是一家以為鵠書非也金
石錄云按魏志文帝以黃初二年正月下詔以議郎
孔羨為宗聖侯奉孔子之祀及令魯修舊廟今以碑
考之乃黃初元年當以碑為正

魏橫海將軍呂君碑 黃初二年 未詳所在 額題

云魏故橫海將軍章陵太守都鄉侯呂君之碑十七
篆字隸釋云呂君名字皆剝魏隸之佳者惟鍾梁
之碑四若范武碑則又次之此刻差勝劉熹賈逵爾
魏大饗記殘碑 黃初三年 隸續云在長安瑤臺寺
額題云大饗記三古文為一行碑圖云額之兩旁有
白紋貫於上下外有暈兩重不過額其文十二行行
十七字非全碑也黃初三年及千秋萬代字平闕隸
續云額第三字不能識以其辭中有記字故名之此

碑二百餘字損者四之一所存之文殆不可曉其書法與魏受禪相近文帝大饗六軍立碑於譙在是年之前兩載此書饗為嚮或是假借受禪碑蓋鍾繇所書此碑黃初之年月之下有一字其左從畀而闕其右疑是繇字或謂之鍾繇殘碑姑傳疑以俟知者

魏修老子廟詔 黃初三年 字原云在亳州 無額
碑式云詔十六行行八字後兩行書年月隸續云苦
縣過水北有老子廟水經曰廟前南門外有漢碑北

有雙石闕甚整頓在闕南側魏文帝黃初三年徑譙所勒此碑磨滅者太半蓋是詔豫部修祠之事當時刻之於碑也碑之下方有唐開元及天寶間題字數十行乃真源縣令邵昕記祠醮投龍之事真源屬亳州今曰衛真即漢之苦縣也集古錄作太清東闕題名

魏范武碑 青龍三年 天下碑錄云在濟州任城縣西南四十里大頂山南濟州今為濟寧州 額題云

故廬江太守范府君之碑十篆字范府君名式字巨卿見後漢書獨行傳此碑縣長薛君鄉人翟循等為之立廟建碑金石錄云法書要錄以為蔡邕書今以碑考之乃魏青龍三年立非邕書也隸釋云此碑雖不及延康黃初四刻在魏他碑中為可取爾唐李嗣真作書後品乃云蔡公諸體惟范巨卿碑風華豔麗古今冠絕甚矣藻鑑之謬也

魏三體石經左傳遺字 正始三年 集古錄目云在

洛陽蘇氏家按有翻本在成都胡宗愈與中郎石經遺字並鑒之錦官西樓宇文紹奕跋云又得古文篆隸三體石經八百二十九蓋即洛陽蘇氏本而重刻之也

隸續云魏三體石經左傳遺字古文三百七十篆文二百十七隸書二百九十五有一字而三體不具者皇祐癸巳洛陽蘇望氏所刻蘇君有言曰後漢熹平四年靈帝以經籍文字穿鑿疑誤後學詔諸儒讎定

五經命蔡邕書古文篆隸三體鐫石立於太學今石
不存本亦罕見近於故相王文康家得左傳撮本數
紙其石斷剥字多亡缺取其完者摹刻凡八百一十
九題曰石經遺字即小歐集古目中所有者 石經
見於范史帝紀及儒林宦者傳皆曰五經蔡邕張馴
傳則曰六經惟儒林傳云為古文篆隸三體書法酈
氏水經云漢立石經於太學魏正始中又刻古文篆
隸三字石經唐志有三字石經古篆兩種曰尚書曰

左傳獨隋志所書異同其目有一字石經七種三字石經三種既以七經為蔡邕書矣又云魏立一字石經乃其誤也范蔚宗時三體石經與熹平所鐫並列於學宮故史筆誤書其事後人襲其譌錯或不見石刻無以考正趙氏雖以一字為中郎所書而未嘗見三體者歐陽氏以三體為漢碑而未嘗見一字者予作隸釋鑒漢魏之字法詳公羊之題名據水經之事實辨二史之牴牾已定一字石經為漢刻矣續得蘇

氏此碑前說猶墨守也蓋喜歷古所疑於今始判隸
釋云歐陽集古錄諸碑皆有跋尾獨三體石經置而
弗論豈有所疑而未決乎小歐陽集古錄目遂定為
漢刻蓋為儒林傳所誤也按晉書衛恒傳云魏初傳
古文者出於邯鄲淳至正始中立三字石經轉失淳
法因科斗之名遂效其形魏書江式傳云魏陳留邯
鄲淳特善倉雅許氏字伯八體六書精究閑理以書
教諸皇子又建三字石經於漢碑之西其文蔚炳三

體復宣石經考云據衛恒傳所言三字石經非邯鄲
淳書金石文字記云江式傳則不考衛恒之言而失
之者也胡三省通鑑注魏碑以正始中立而漢書言
元嘉元年度尚命邯鄲淳作曹娥碑時淳已弱冠自
元嘉至正始九十餘年謂淳所書非也

魏甄皇后識坐版函 無年月 隸續云紹聖丙子鄴
民耕地得之 其文云文昭皇后識坐版函共八字
隸續云一綠石匣廣八寸有半長倍之厚三之一鹿

頂笏頭蓋其上有此八字魏文帝甄皇后神坐前之物也故嘉興守林衡之父時為相之臨漳令模得之其字乃魏隸之工者傳於世既鮮故士大夫罕見魏史黃初中葬甄夫人於鄴州帝以母氏之故追上尊諡別立寢廟此乃明帝時所刻者

晉司馬整碑 泰始四年 集古錄云在光化軍軍即襄州穀城縣之陰城鎮陰城當魏晉時為南鄉屬縣額題云宣威將軍南鄉太守司馬府君紀德頌十

五字集古錄云南鄉太守者司馬整也按晉書宣帝弟安平獻王孚孚次子曰義陽成王望望第三子曰隨穆王整整以魏咸熙二年為南鄉太守是歲晉武受禪改元泰始泰始三年徙整南陽而南鄉人為整建此碑廣川書跋云書為隸古氣質渾厚與鴻都石經可一二校也

司馬整碑陰 集古錄云南鄉太守將吏三百五十人其磨滅者猶有二十餘人人皆有邑姓名字而無次

序其名號有令有長有南閤祭酒門下督主簿部督
郵監汀督郵部勸農五官掾文學掾營車掾軍謀掾
府門亭長主記史待事掾待事史部曲將部曲督又
有賊曹功曹議曹戶曹金曹水曹科曹倉曹鎧曹左
右兵曹曹皆有掾又有祭酒有史有書佐有修行有
從掾位有從史位有史有小史等魏晉之際太守官
屬之制蓋如此他書或時見一二不能如此之備也
晉鄭烈碑 太康四年 未詳所在 額題云晉故右

軍將軍平莞僖侯鄭府君之碑十五隸字隸續云鄭君名烈滎陽人以太康二年八月卒故吏申楊等立此碑四年之七月也鄭君所封其上一平字則曉然可識下二字額已損而銘辭亦微缺僅存莞字趙氏以為東莞則誤也晉縣亦無平莞非鄉名即亭名也余嘗以魏末至晉宋隸字無可取者晚獲此碑勁健方格雜置漢刻中未易甄別

晉張平子碑 永初四年 字原云在鄧州 隸釋云

張平子碑晉南陽相夏侯湛作水經云西鄂縣有平子墓墓東有碑文字悉是篆崔瑗之辭也盛弘之郭仲產並云夏侯孝若為郡簿其文復刊碑陰為銘然碑陰二銘乃崔子玉及陳翕隸字耳墓次又有二碑僅見其一以夏景驛途疲而莫究酈氏之說如此今世所傳凡百君子者即平子篆碑其石已中斷此刻有夏侯姓名而云書之碑側蓋酈氏考之不詳也

公秉校官掾王幽題名 字原云淳熙二年邛州蒲江

縣僧寺治地得之 隸續云字畫有東都氣象非魏
晉筆法校官掾者東都郡縣之吏屬公乘者漢爵第
八級而云永熙元年二月則無此年號東都紀年有
延熙光熹亦有書光熹為光喜者漢人作隸好假借
或是借熹作喜作熹又作熙光字恐史策之誤但弘
農王四月即位改元是年二月猶是中平西晉惠帝
雖有永熙而改元亦是四月此碑非光熹永熙明矣
俟博古者剖判之

以上諸碑并甄文欵識自漢五鳳迄於晉泰始凡家之所藏與隸釋隸續之所收字原之所摹集其字入辨中者共得三百一十有二博采他書以為之考嗟乎到今不毀已十無其一矣又考水經注尚有八十二碑集古金石二錄尚有二十一碑補列於後洪景伯所謂姑聚其說以見思古之意爾天下碑錄輿地碑目有年月可徵者附見五碑

水經注八十二碑

諸碑之說已見於前諸碑下茲不重錄惟顧氏有考者錄

之後
同

王立碑 永平闕年 王子香廟頌 永元十八年

先尼和碑 永建二年 王誨碑 陽嘉三年

洛陽橋石柱銘 陽嘉四年 太學碑 陽嘉八年

司馬遷碑 永嘉四年 漳河神壇碑 建和三年

孔子廟碑 建和五年 班孟堅碑 建和十年

曹娥碑 元嘉元年 彭山廟碑 元嘉三年

李母冢碑 永興元年

王君造四縣邸碑 延熹二年

胡著碑 延熹四年 廣野君廟碑 延熹六年

王子喬碑 延熹八年 曹君碑 延熹九年

盛允碑 延熹闕年 許續碑 延熹闕年

趙融碑 建寧元年 楊叔恭碑 建寧四年

郭林宗碑 建寧四年 天下碑錄云在汾州介休縣墓

側又有郭有道碑云在太原府平晉縣蔡邕文并書

在龍泉側按有道止一碑此其誤也 按此碑久已

不存歐趙亦未見隸釋云凡歐趙錄中所無者世不復有之矣今林宗墓側有一碑乃近人傅山所為體既杜撰跡復醜惡無知者以為中郎書爭相傳拓可笑也聞鄭簠又書一碑與傅山並峙豈以傅山為非其人而欲自擬中郎耶以五十步笑百步則何如

石門銘

建寧四年

趙越碑

建寧闕年

許嬰碑

建寧闕年

山桑城殘碑陰

熹平元年

李剛碑

熹平元年按隸續有李剛石室畫像而無碑

幽冀二州界石文 熹平四年

薛季像碑 熹平五年 橋載碑 熹平五年

梧臺石社碑 熹平五年 曹熾碑 熹平六年

曹盾碑 熹平六年 張平仲碑 光和闕年

橋玄碑 光和元年

說見前

按後漢書橋玄傳光和六年

卒蔡邕集太尉橋公碑有二俱云光和七年薨水經

注謂是碑作於光和元年恐其誤也其載鼎銘文曰

文德銘於三鼎云云乃是蔡邕橋公碑中語非鼎銘

文也邕有東中西鼎三銘見於集中集又有黃氏銘
所云鉞文稱是用鏤石作茲征鉞亦邕銘中語而謂
碑文為李友作豈後人搜采邕文誤入他人之文耶

楊彥楊禪二碑 光和闕年 許叔臺碑 光和闕年

文穆碑 光和闕年 尹儉碑 中平四年

太石嶺碑 中平六年 華山祠堂碑 建安闕年

夷齊廟碑 無年月 宋子浚碑 無年月

李雲碑 無年月 太公廟碑 無年月

趙徵碑 無年月 許由廟碑 無年月

郭奉孝碑 無年月 司馬文預碑 無年月

梁巖碑 無年月 張伯雅碑 無年月

袁滂袁騰袁光三碑 無年月 天下碑錄云袁騰良之

仲子也

虞訓碑 無年月 柘令許君頌 無年月

熹平君碑 無年月 繹幕令碑 無年月

袁安碑 無年月 皇毓碑 無年月

臨睢長王君碑

無年月

鄭陂頌

無年月

季札子碑

無年月

東平憲王碑

無年月

道兒君碑

無年月

孫嵩碑

無年月

孫賓碩碑

無年月

鄭康成碑

無年月

冠蓋里碑

無年月

張仲瑜碑

無年月

張敏碑

無年月

左伯豪碑

無年月

樊重樊萌碑

無年月

賈彪廟碑

無年月

焦立碑

無年月

范蠡碑

無年月

舜廟碑 無年月 二妃祠碑 無年月

屈原廟碑 無年月 程堅碑 無年月

瀧中碑 無年月

集古金石二錄二十一碑

田君碑 延熹二年天下碑錄作費令田君德政碑

朔方太守碑陰 延熹五年以上集古錄

南武陽功曹闕銘 章和元年

章和石記 章和二年有錄無說

空室銘 永建元年有錄無說 武氏石闕記 建和元年

武開明碑 建和二年 孔君碣 永壽元年

河東界石記 延熹四年有錄無說

嵩高山石闕銘 熹平四年 蒼頡廟碑 熹平六年

禹廟碑 光和二年 敬使君碑 光和四年

張侯殘碑 闕年月 蒼頡廟人名 無年月集古錄有跋

鍾君碑 無年月有錄無說

陽都長徐君闕銘 無年月同上

首山復民祖碑 無年月同上

逢君殘碑 無年月同上以上俱金石錄

天下碑目輿地碑目五碑

西嶽石闕銘 永和元年金石錄有跋

封龍山碑 延熹七年 高祖感應碑 延熹十年

八都神廟 光和闕年以上天下碑目

張子陽碑 永建四年右輿地碑目



六藝之一錄卷一百十六